АКАФИСТ ПРЕПОДОБНОМУ ОТЦУ НАШЕМУ ТИХОНУ, ЛУХСКОМУ ЧУДОТВОРЦУ

Кондак 1

Избранный и дивный угодниче Христов, преподобне отче Тихоне! По достоянию ублажити тя недоумеем мы, любовию чтущии тя; обаче тоюжде любовию побуждаеми, похвальная восписовати тебе дерзаем. Ты же, просвещаяся ныне обильно от Божественнаго света во Царствии Христа Бога, и нас омраченных греховными страстьми просвети, и твоими ко Господу молитвами от всяких бед избави, да радующеся вопием ти: Радуйся, Тихоне преподобне, преславный чудотворче.

<u>Икос 1</u>

Ангельстии чини возрадовашася твоим подвигом, имиже в пустыни сей подвизался еси, в посте и бдении просияв и в молитвах непрестанных, серафимскою горя любовию к Богу. Темже мы ныне почитающе тя, яко приснаго собеседника ангелов, со усердием похвальная пения восписуем ти сице: Радуйся, во плоти небесный жителю; Радуйся, страстей телесных победителю. Радуйся, воздержания образ явивый; Радуйся, пустыню Луховскую просветивый. Радуйся, иноком на спасение учителю; Радуйся, безмолвия добрый рачителю. Радуйся, истинный в добродетелех наставниче; Радуйся, скорый в скорбех помощниче. Радуйся, на путь правый заблуждающих наставляяй; Радуйся, неослабнаго терпения образ нам являяй. Радуйся, унывающих утешение; Радуйся, согрешающих исправление. Радуйся, Тихоне преподобне, преславный чудотворче.

Кондак 2

Видяще окрестнии жители безмолвное житие твое, преподобне отче наш Тихоне, дивляхуся твоему терпению; темже и мы, духовная чада твоя, любезно ныне воспоминающе подвиги и труды твоя, прославляем тебе прославившаго Бога, дивнаго во святых Своих, и поем Ему: Аллилуиа.

<u>Икос 2</u>

Разуму податися нам Божественному, помолися к Сильному и Богу разумов, преподобне отче Тихоне, во еже разумно ублажати тя; ты бо Божественным сияя светом, со ангелы водворяешися ныне, и приими посильное ублажение сие от нас, радостно похвалы сицевая тебе приносящих: Радуйся, постническими добродетельми просиявый; Радуйся, Божественную благодать стяжавый. Радуйся, чистоты усердный хранителю; Радуйся, безмолвия истинный любителю. Радуйся, ангелов собеседниче; Радуйся, ко Христу Богу о нас грешных молитвенниче. Радуйся, Троичнаго света присный зрителю; Радуйся, темныя об-

ласти слуг прогонителю. Радуйся, подвигов иноческих наставниче; Радуйся, небесныя славы наследниче. Радуйся, яко печали от человек отгоняеши; Радуйся, яко скорую помощь всем подаваеши. Радуйся, Тихоне преподобне, преславный чудотворче.

Кондак 3

Сила Вышняго благодатне осени тя, преподобне отче Тихоне, и показа тя всем яве селение и жилище быти Святаго Духа. Темже и мы, любовию почитающе память твою, верно вопием Богу, дивному во святых Своих: Аллилуиа.

Икос 3

Имуще тя велика, отче, заступника и скораго в бедах и напастех помощника, мы, духовная чада твоя, святую память твою совершающе, сия тебе любовию восписуем: Радуйся, скорбящим Божественное утешение; Радуйся, светлое Божия благодати селение. Радуйся, ревностный Троицы Святыя служителю; Радуйся, скорый всех унывающих посетителю. Радуйся, противныя силы прогнание; Радуйся, недугующих врачевание. Радуйся, столпе веры, Богом Самим утвержденный; Радуйся, учителю благочестия совершенный. Радуйся, ко спасению всем нам благонадежный водителю; Радуйся, бедствующих защитителю. Радуйся, Бога паче всего возлюбивый; Радуйся, богатство и славу мира сего ни во чтоже вменивый. Радуйся, Тихоне преподобне, преславный чудотворче.

Кондак 4

Бурю страстей многомятежнаго мира сего возненавидев, преподобне отче Тихоне, устранился еси сует его и водворился еси в пустыни, чая Бога, спасающаго тя от малодушия и от бури. Ныне же в вышних обителех водворяяся, Владыце всех с небесными силами предстоиши, поя купно с ними спасшему тя Богу: Аллилуиа.

<u>Икос 4</u>

Светозарную лучу имуще тя вернии, молим тя, преподобне отче наш Тихоне, просвети и вразуми сердца наша во спасение, да радующеся вопием тебе сице: Радуйся, пределов Костромских украшение; Радуйся, Луховския пустыни озарение. Радуйся, постников красото; Радуйся, подвижников доброто. Радуйся, благодатию Духа Святаго осиянный; Радуйся, источниче чудес богодарованный. Радуйся, исцелений независтный подателю; Радуйся, немудрых богомудрый наказателю. Радуйся, в болезнех сущих добрый врачу и целителю; Радуйся, всех призывающих тя с верою скорый посетителю. Радуйся, чудесы твоими Луховскую страну просвещающий; Радуйся, исправлении твоими славу Божию возвещающий. Радуйся, Тихоне преподобне, преславный чудо-творче.

Светильника тя показа светла, иже чудес Бог и Отец светов, горяща и светяща в сей уединенной пустыни, преподобне отче наш Тихоне. Темже окрестнии людие, дивящеся твоему благочестию и святыне, воспеваху дивному во святых Своих Богу песнь: Аллилуиа.

<u>Икос 5</u>

Видяще святое твое житие людие Луховстии, Тихоне преподобне, начаша благоговейно тебе почитати: ты же, бегая славы человеческия, тай работал еси Богу, прославлышему тя яве славою нетления и благоуханием святыни. Темже и мы, духовная чада твоя, сицевая любовию вопием ти: Радуйся, яко светило в пустыни сей сияющий; Радуйся, чудесы твоими всех просвещающий. Радуйся, наставниче великий на путь спасения; Радуйся, истинный последователю Евангельскаго Христова учения. Радуйся, иго Христово благое на себе восприявый; Радуйся, всего себе и весь живот твой Христу Богу предавый. Радуйся, нестяжания образ нам явивый; Радуйся, вольную нищету возлюбивый. Радуйся, забывшаго обет свой человека отечески наказавый; Радуйся, томужде вскоре исцеление и здравие телесное чудесно даровавый. Радуйся, терпением скорбей всяческих в пустыни сей просиявый; Радуйся, вольною нищетою вечное богатство стяжавый. Радуйся, Тихоне преподобне, преславный чудотворче.

Кондак 6

Гласа, вопиющаго в пустыни: "Уготовайте путь Господень", и проповеди Евангельския, еже не пещися ни о чесом же, послушавый от сердца, вся сущая в мире Бога ради презрел и оставил еси, да Христа единаго приобрящеши, Тихоне преподобне. Темже и нам от Христа Бога получити ослабу от страстей умоли, вопиющим Ему: Аллилуиа.

<u>Икос 6</u>

Возсиял еси от Литовския земли, яко светозарная звезда от темнаго запада, преподобне отче Тихоне, и просветил еси пустыню Луховскую сиянием твоих доблестей. Темже молим тя усердно, от всяких вражеских наветов данною тебе от Бога благодатию избавити нас, вопиющих тебе сицевая: Радуйся, крест твой терпеливно носивый; Радуйся, плоть свою духови покоривый. Радуйся, усердный винограда Христова делателю; Радуйся, пустыни тщаливый устроителю. Радуйся, ублажаемый на земли; Радуйся, прославляемый на небеси. Радуйся, от страстей и бед чтущия тя избавляющий; Радуйся, молящихся тебе от уз греховных разрешающий. Радуйся, яко мзда твоя на небеси многа; Радуйся, яко восприял еси сугубо воздаяние трудов твоих от Бога. Радуйся, вышняго Сиона гражданине; Радуйся, моляйся тамо о нас, молитвенно воспоминающих тя ныне. Радуйся, Тихоне преподобне, преславный чудотворче.

Удивися Суждальский епископ Симеон твоей нищете глубоцей и совершенному нестяжанию, преподобне отче Тихоне, еже наипаче по преставлении твоем всем яве показал еси; темже от своих си усердно послужи твоему погребению, зовый Богу песнь: Аллилуиа.

<u>Икос 7</u>

Новый воистинну подвижник показался еси и стране сей, Тихоне преподобне, с преподобным Макарием подвизався, с нимже купно и упокоеваешися в вечных обителех. Мы же почитающе твоя подвиги и труды, похвальными песнопении сице память твою ублажаем: Радуйся, постом и бдением и молитвою страсти греховныя разуму покоривый; Радуйся, оружием креста князя тьмы победивый. Радуйся, яко всякое желание плотское увядил еси; Радуйся, яко безстрастием природу победил еси. Радуйся, иноческих подвигов ревнителю; Радуйся, пустыни Луховския благоукрасителю. Радуйся, постников похвало и славо; Радуйся, воздержания подвижников зерцало. Радуйся, всякую добродетель в себе изобразивый; Радуйся, иго Христово и бремя Его легкое возлюбивый. Радуйся, истинную веру собою утверждающий; Радуйся, в невечернем дни Царствия Христова пребывающий. Радуйся, Тихоне преподобне, преславный чудотворче.

Кондак 8

Странное и жестокое житие твое бысть в мире сем, Тихоне преподобне; ты бо и землю пустынную орати рукама своима не возгнушался еси, и в дрсводелии упражняяся, неблагообразныя виды лепотным благообразием украшал еси, и телесную болезнь терпением побеждая, непрестанною молитвою воспевал еси выну, яко безплотен, песнь Богови: Аллилуиа.

<u>Икос 8</u>

Весь был еси умом и сердцем твоим в вышних, аще и в земледелии упражнялся еси, преподобне Тихоне, и горе оком души твоея присно взирал еси. Темже и ныне всецело водворялся тамо, заступаеши всех, верою и любовию вопиющих тебе таковая: Радуйся, новый пустынножителю; Радуйся, древних подвижник усердный ревнителю. Радуйся, Сергию Великому подражавый; Радуйся, в пустыни Луховстей чудесы просиявый. Радуйся, духовнаго совершенства учителю; Радуйся, добродетелей христианских рачителю. Радуйся, всяцем образом Владыце всех угодивый; Радуйся, равноангельное житие во плоти на земли поживый. Радуйся, яко молитвы Богу присно о нас приносиши; Радуйся, яко всем полезная от Бога просиши. Радуйся, яко Христа в души твоей вообразил еси; Радуйся, яко равную с первыми делатели, аще и последнейший леты, мзду от Него получил еси. Радуйся, Тихоне преподобне, преславный чудотворче.

Луховская страна удивися тебе, Тихоне преподобне, во дни подвигов и трудов твоих; но и доныне по достоянию ублажает честную память твою. Ты бо мира сего красная ни во чтоже вменив и Единаго Бога всем сердцем своим возлюбив, явился еси воистинну глас вопиющаго в пустыни, и яко безплотен во плоти пожив, воспевал еси непрестанно, и ныне со ангелы поеши присно Богу песнь: Аллилуиа.

<u>Икос 9</u>

Витии хитрословесныя по достоянию восхвалити тя не могут, богомудре отче наш Тихоне: ты бо от юности весь Богу прилепился еси, и даже до конца многотруднаго жития твоего Тому усердно послужил еси. Мы же любовию вопием тебе сице, по силе нашей тя ублажающе: Радуйся, православия ревнителю; Радуйся, благочестия рачителю. Радуйся, напастей тьму отгоняяй; Радуйся, на путь спасения наставляяй. Радуйся, яко нас, чад твоих, духовно посещаеши; Радуйся, яко многая благодеяния всем подаваеши. Радуйся, яко молитвы о нас Богу приносиши; Радуйся, яко о всех злостраждущих Господа просиши. Радуйся, унывающих утешение; Радуйся, согрешающих исправление. Радуйся, пустынножителей российских удобрение; Радуйся, костромских пределов славо и похваление. Радуйся, Тихоне преподобне, преславный чудотворче.

Кондак 10

Спасти хотя душу твою, преподобне отче наш Тихоне, инославнаго отступнического суемудрия благоразумно отбегл еси, и областей великия России достиг, в пустыни Луховския страны православную веру невредимо соблюл еси, еюже к вечному Востоку востек, со ангелы поеши присно песнь Богови: Аллилуиа.

<u>Икос 10</u>

Стену тя незыблему и град убежища необоримый во всех скорбех и напастех житейских стяжавше, преподобне отче наш Тихоне, тебе, яко присному к Богу о нас молитвеннику, похвальная приносим пения сице: Радуйся, сущих в бедах и треволнениях всегда готовый посетителю; Радуйся, Божественных велений ревностный исполнителю. Радуйся, яко молитвою и постом врагов шатания низложил еси; Радуйся, яко пути Господни правыя тщаливо сохранил еси. Радуйся, страсти плотския воздержанием умертвивый; Радуйся, во плоти, яко безплотен, на земли сей поживый. Радуйся, многосуетнаго мира любве ради Христовы отрекийся; Радуйся, в пустыни, яко в тихом пристанище, в нова человека, созданнаго по Богу, в правде и святости истины облекийся. Радуйся, яко неозрелся еси вспять, возложь руку твою на рало; Радуйся, граду нашему Луху и всей стране его стена и забрало. Радуйся, веры светлый светильниче; Радуйся, ко грядущему граду верный наставниче. Радуйся, Тихоне преподобне, преславный чудотворче.

Пение всех Богови непрестанное во всем житии твоем приносил еси, преподобне отче наш Тихоне. Ныне же от нас воспеваемый и по достоянию ублажаемый на земли, тамо на небеси купно со ангелы прославлышему тя дивно Богу воспеваеши вечное: Аллилуиа.

<u>Икос 11</u>

Светозарный светильниче благодати и великий угодниче Божий, Тихоне преблаженне. Ты многими и великими добродетельми сияюшь, яко светило умнаго неба, вшел еси в небесныя обители и предстал еси Престолу Царя Славы, идеже ныне и нас поминай, вопиющих тебе сицевая: Радуйся, яко закон Христов не словом или языком, но самым делом истинно исполнил еси; Радуйся, яко всецело посвятився Богу, совершенно ему благоугодил еси. Радуйся, за сие восприятый от Него в горняя селения; Радуйся, сподобивыйся тамо с верными Его рабами вечнаго веселия. Радуйся, в истинней вере нас утверждающий; Радуйся, от напастей и бед свобождающий. Радуйся, яко безплотным подобно пожил еси; Радуйся, яко ангельских ликостояний сподобился еси. Радуйся, Божия благодати нам ходатаю; Радуйся, Божиих дарований всем подателю. Радуйся, яко врагов спасения нашего посрамляещи; Радуйся, яко вся козни и наветы их разрушаещи. Радуйся, Тихоне преподобне, преславный чудотворче.

Кондак 12

Благодать, данную тебе свыше от Отца светов, преподобне отче наш Тихоне, и вся труды твоя и подвиги кто от человек изрещи и похвалити возможет по достоянию; в пустыни бо нестяжательно и трудолюбно пожив, стяжал еси смирением твоим высокая и нищетою твоею богатая, и вселился еси со ангелы и всеми святыми в горнем Иерусалиме, поя присно Богу песнь: Аллилуиа.

<u>Икос 12</u>

Поем добльственныя твоя подвиги, ублажаем святое житие твое, почитаем честную и достохвальную кончину твою и прославляем священную память твою, преподобне отче наш Тихоне! И от избытка сердца похвальная вопием ти сице: Радуйся, от ангел с торжеством в радость Господа твоего введенный; Радуйся, в чертозе небеснем лику святых сопричтенный. Радуйся, православных крепкий поборниче; Радуйся, христианом скорый помощниче. Радуйся, истинныя веры, терпения и смиренномудрия добрый блюстителю; Радуйся, суеверия и всякия злобы и вражды искоренителю. Радуйся, пустынное стадо твое духовно посещаяй; Радуйся, нам, духовным чадом твоим, мир и благословение свыше невидимо подаваяй. Радуйся, делателю добрый; Радуйся, пастырю бодрый. Радуйся, избранный сосуд благостыни; Радуйся, прославленный от Господа благоуханием святыни. Радуйся, Тихоне преподобне, преславный чудотворче.

О всехвальный угодниче Христов и чудотворче предивный, преподобне и блажение отче Тихоне! Молим тя верою и любовию, и вопием тебе всеусердно: приими ныне малое моление сие наше и умоли милостиваго Бога, да избавит нас от всяких бед и напастей молитвами твоими, и будущия свободит муки вопиющих Ему: Аллилуиа.

(Этот кондак читается трижды, затем икос 1 и кондак 1)